

Tschentar enzennas dalla cardientscha

La cardientscha basegna enzennas, rituals, usits, simbols, schiglioc daventa tut indifferent. Valurs e perschuasiums perdan lur muntada per la veta da mintgadi. La cardientscha evapurescha.

Ei dat numerusas pusseivladads da tschentar atgnas enzennas dalla cardientscha. In da quels segns ei segiramein il sontget da pelegriuns cun il maletg dalla „Dreimal Wunderbaren Mutter von Schönstatt“ ch'ei regularmeins dapi varga 10 onns adina puspei en entginas casadas da nossas pleivs.

La recepziun meinsila da Jesus e Maria ell'enzenna dil sontget da pelegriuns signalisescha: Diu ei beinvegnius, en nossa casa, en nossa veta, en nossa situaziun momentana. Diu buca mo accumpogna nus, mobein, nus mein era cun EL. Sco Maria dein nus plaz e spazi a Christus. Nus sefidein sin l'intercessiun da Maria ed essan aviarts per la benedicziun da Diu.

Aschia sa l'indicaziun „SIN VIA TIER TEI“ esser capeivla per omisduas varts. Da nus anora: Sin via tier Diu e da Diu anora: Dieus sin via tier nus carstgauns.

Igl apostolat cun il sontget astga festivar uonn il giubileum da 60 onns. Da present ein varga 200 000 sontgets sin via en 92 tiaras. Plirs milliuns carstgauns prendan meins per meins la Nossadunna per entgins dis tier els a casa; tenor s. Gion 19,27: „E da quell'ura naven ha il giuvnal priu Maria en ca-sia“.

Il maletg davontier: In dils sontgets en nossas pleiv



Sche vus haveis era plascher da separticipar a quella cadeina e dar al sontget inagada el meins albiert, lu s'annunziei tier mei ni directamein tier las dunnas ch'ei responsablas. (Tenor informaziun giusut).

Vies sur Peter

Pelegriadi a Nossadunna da „Schönstatt“

SIN VIA TIER TEI - Sonda, ils 16 d'october 2010 ha liug a Quarten la sentupada dils veneraturs da Nossadunna da „Schönstatt“. Cul tema: „Ti eis units – ina reit che porta“ less la dieta porscher sustegn e curascha per la veta da mintga di.

Ei fagess grond plascher d'astgar beneventar numerusas persunas a quella sentupada. Il program detagliau sesanfla en baselgia parochiala. Las annunzias prendan bugen encunter entochen ils 02 d'october 2010 per Falera: Agnes Cathomen, tel. 081 / 921 30 61, per Laax: Nesa Coray, tel. 081/ 921 48 24.

Cordiala gratulaziun a nies sur Peter Aregger

Naven dils 7 d'uost 2000 ei sur Peter en nossas pleivs da Laax e Falera. Gl'emprem sco diacon ed igl onn 2001 havein nus astgau festivar sia messa nuviala. Avon treis onns ei sur Peter vegnius elegius honorificamein sco nies plevon. Ussa havein nus la quida da gratular cordialmein per ses 10 onns en nossa cuminonza. Nus essan engrazieivels per tut il grond engaschi, per tut ils veseivels survetschs, ed era per quels numerus el zuppau. Lein buca emblidar la gronda bunaveglia demussada enviers nies lungatg mumma, il romontsch. – Car sur Peter, Dieus paghi che Ti accumpognas nus sin quella via, lein sperar che nus possien aunc biars onns continuar ensemen cun Tei ina via comunabla a Laax e Falera.

Las suprastonzas dallas pleivs Laax e Falera

Communiun dils malsauns:

Mesjamna, ils 13-10-2010 suentermiezdi

October - meins dil s. Rusari

Cordiala invitaziun per urar il s. Rusari da cuminonza en baselgia. Ei fuss bien da far il propiest, da prender oravontut el meins d'october stediamein part all'oraziun da Nossadunna.

Perdanonza

La fiasta da Perdanonza dils 17 d'october detti a nus danovamein impuls e plascher da saver viver en ina cuminonza cristiana cun tut ses usits. La fiasta ch'ei dedicata a nos patrums baselgia s. Gagl e s. Otmar regali a nus la forza da viver cun perschasiun ina veta sco cristifideivel.

Dieus paghi a tuts parochians ch'embelleschan la fiasta cun ornar la baselgia, cun cant e parada ed entras separticipar al survetsch divin ed alla processiun.

Lein arver igl esch da nies cor, da nossas casas sco era igl esch dalla baselgia per festivar en ina buna cuminonza ed emperneivla cumpignia la fiasta da nossa Pleiv.

Ei vegn filmau

La suprastonza dalla Pleiv ha surdau l'incumbensa da far in film sur dils usits religios da Laax ad Andreas Joos e Maria Cadruvi dalla firma Octopus-Media a Ruschein. Els vegnan ad esser adina puspei presents cun camera e microfon tier las fiastas ed usits da baselgia. L'emprema gada uonn da Perdanonza e lu adina puspei enteifer in onn. La lavur da filmar duess buca disturbar la devoziun dils presents e l'atmosfera dallas funcziuns. – Nus engraziein gia ordavon per vossa capientscha.

Communiun dils malsauns:

Venderdis, ils 01-10-2010 suentermiezdi

Gievgia, ils 21-10-2010 suentermiezdi

Messa da s. Hubertus, ils 24 d'october 2010

Era uonn astgein nus festivar la s. Messa cun l'uniun da catschadurs Vorab. La s. Messa vegn enrihida cun ina gruppa da corns da catscha. Cordial beinvegni!

Devoziun dallas mummas e lur affons en baselgia

Ils 26 d'october 2010 allas 16.00h ein tuttas mummas e lur affons envidadas cordialmein alla devoziun en baselgia. Ei fagess grond plascher da sentupar ussa igl atun cun numerusas mummas ed affons per ludar ed engraziar al bien Diu per tut la raccolta ed ils plaschers dil mintgadi.

Fiasta dil s. Batten a s. Rumetg

Dumengia, ils 3 d'october 2010 retscheiva *Arun Loris Sriarsa* feagl da Prawit e Nadia Sriarsa-Lombriser e dumengia, ils 31 d'october 2010 retscheiva *Johanna Lena Ambühl*, feglia da Simon e Sarah Maria Ambühl il s. sacrament dil Batten.

Nus gratulein allas famiglias cordialmein e giavischein bien sustegn e ventira ella cuminonza cristiana.

Nozzas a s. Rumetg

Sonda, ils 9 d'october 2010 festiveschan *Claudia Jakob* ed *Ignaz Arpagaus* lur di da nozzas. Nus gratulein cordialmein als nozzadurs e giavischein bia fortuna e la benedicziun da Diu sin lur via matrimoniala.